

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", broj 30/03 i 42/03) i člana 16. stav 1. tačka a), 49. i 62. Zakona o državnoj službi u institucijama Bosne i Hercegovine ("Službeni glasnik BiH", broj 19/02, 35/03, 4/04, 17/04, 26/04, 37/04 i 48/05), Vijeće ministara Bosne i Hercegovine, na prijedlog Agencije za državnu službu, na 99. sjednici održanoj 1. decembra 2005. godine, usvojilo je

ODLUKU

O UTVRĐIVANJU MEĐUSOBNIH ODNOSA I OBAVEZA IZMEĐU AGENCIJE ZA DRŽAVNU SLUŽBU, DRŽAVNOG SLUŽBENIKA - PREDAVAČA I INSTITUCIJE BOSNE I HERCEGOVINE U KOJOJ JE ZAPOSLEN DRŽAVNI SLUŽBENIK - PREDAVAČ

Član 1.

(Predmet Odluke i izuzeća)

- (1) Ovom Odlukom uspostavljaju se i definišu međusobni odnosi i obaveze između Agencije za državnu službu (u daljnjem tekstu: Agencija), državnog službenika - predavača (u daljnjem tekstu: predavač) i institucije Bosne i Hercegovine u kojoj je zaposlen predavač (u daljnjem tekstu: institucija).
- (2) Na prava državnih službenika utvrđena ovom Odlukom neće se primjenjivati odredbe Odluke o slučajevima u kojima se može dati odobrenje državnom službeniku da obavlja dodatnu aktivnost ("Službeni glasnik BiH", broj 21/04).

Član 2.

(Cilj donošenja)

- (1) Cilj ove Odluke je da se stvori pravni okvir u kom bi se jasno utvrdila prava i obaveze svih sudionika pobrojanih u članu (1), što bi omogućilo da se ovaj način educiranja i prakse uvede u institucije, iz razloga što je u nedostatku nevladinih organizacija i udruženja koja se bave obukom neophodno stvoriti vlastitu bazu kvalitetnih predavača, koji bi se aktivno uključili u procese obuke koje organizira Agencija, kao i druge oblike obuke državnih službenika.

Član 3.

(Ovlaštenja i obaveze Agencije)

- (1) Agencija kao institucija nadležna za pitanja obuke državnih službenika, ovlaštena je da:
 - a) sklapa sporazume sa domaćim i međunarodnim institucijama ili donatorima, koji će organizirati i izvoditi obuku za predavače
 - b) utvrđuje kriterije i način prijavljivanja kandidata predavača, kao i program i način odvijanja obuke
 - c) objavljuje javni poziv za prijavljivanje na obuku za predavače
 - d) osigurava transparentan odabir kandidata zasnovan na ranije uspostavljenim kriterijima koji su u skladu sa glavnim principima Zakona o državnoj službi u institucijama Bosne i Hercegovine
 - e) obezbjeđuje da svršeni polaznik obuke, predavač dobije odgovarajući sertifikat od strane domaće ili međunarodne institucije koja provede obuku
 - f) utvrđuje način budućeg angažiranja predavača
 - g) organizira, jednom godišnje, provjeru komunikacijskih i prezentacijskih sposobnosti predavača.
- (2) Agencija je obavezna da pri organiziranju obuka vodi računa o angažiranju predavača, ako isti mogu odgovoriti potrebama neke obuke.
- (3) Predavač, u smislu odredaba ove Odluke, može biti državni službenik koji je istaknuti stručnjak u određenoj oblasti ili koji je putem posebnih programa obučan za obavljanje poslova predavača.
- (4) Agencija sačinjava i održava bazu podataka predavača i distribuira je ostalim institucijama i drugim organizacijama koje se bave organiziranjem obuke. Agencija će obezbijediti da baza podataka o predavačima bude dostupna na web stranici Agencije.

(5) Predavača koji je od strane polaznika obuke u tri uzastopna navrata ocijenjen nezadovoljavajućom ocjenom, Agencija će isključiti iz daljeg angažiranja.

Član 4.
(Obaveze i prava predavača)

- (1) Predavač se obavezuje da će:
 - a) dati pismenu obavezu da će završiti obuku prema predviđenom programu
 - b) u periodu od najmanje pet godine raditi kao predavač za potrebe obuka koje organizira Agencija
 - c) se odazvati na sve obuke gdje bi u ulozi predavača trebao održati predavanja za potrebe obuke koje organizira Agencija.
- (2) Neizvršavanje obaveza iz člana (1), osim u slučajevima više sile, povlači disciplinsku odgovornost po predavača.
- (3) Predavač ima pravo da na komercijalnoj osnovi obavlja obuku u institucijama i tokom radnog vremena, a izvan institucija samo izvan radnog vremena.
- (4) Za vrijeme dok predavač održava predavanja, plaća na radnom mjestu mu se umanjuje za period koji nije radio, ukoliko predavanja koja održava prelaze 8 sati sedmično.
- (5) Predavač za predavački rad koji je duži od 8 akademskih sati sedmično mora dobiti saglasnost institucije.
- (6) Predavač ima pravo na usavršavanje u oblasti za koju je kvalificiran kao predavač i u tom pogledu ne može biti sprječavan od strane institucije, pod uvjetom da njegove obaveze na radnom mjestu ne trpe.

Član 5.
(Obaveze i prava institucija)

- (1) Institucija je dužna omogućiti školovanje predavača ukoliko njegov izostanak sa posla neće ugroziti rad institucije, odnosno organizacione jedinice gdje je predavač zaposlen.
- (2) Institucija ne može onemogućavati rad predavača pod uvjetom da predavač nema više od 8 sati rada kao predavač u jednoj sedmici, odnosno 20 sati mjesečno.
- (3) Institucija ima pravo tražiti od predavača koji je u istoj zaposlen, da za potrebe institucije održi predavanja iz oblasti za koju je obučen, bez naknade u toku radnog vremena pri čemu predavač prima puni iznos plaće, ili izvan radnog vremena uz naknadu.
- (4) Institucija koja ima vlastiti program obuke predavača ili ima sporazum sa nekim pravnim licem o školovanju predavača za pojedine oblasti dužna je o istom pribaviti saglasnost Agencije.

Član 10.
(Stupanje na snagu)

Ova Odluka stupa na snagu danom donošenja, a objavit će se u "Službenom glasniku BiH".

VM 290/05
1. decembra 2005. godine
Sarajevo

Predsjedavajući
Vijeća ministara BiH
Adnan Terzić, s. r.